

por vnden in das ein zeyst aufrecht holtz ein rund loch / vnd mach ein schrauben mütterlein / in welche die for gemelt lang schrauben gerecht sey / darnach steck die schrauben mit dem forderen teyl auf einer seyten des zwerch holtz zu dem runden loch hinein / vnd schrauff sie durch das mütterlein des aufrechten holtz piß wider zu dem anderen loch hinaus / also magst du mit diser schrauben das aufrecht holtz gewiß hin vnd her ziehen auf welche seyten du wilt. Darnach por mitten durch dz aufrecht holtz nach lengs ein rund loch / vnd schneyd das holtz auf einer seyten ein wenig auß / vnd auf einer seyten des selben offenen schnittes schneyd vill kleyner kerblein darein / darnach mach ein gedrehten stab der recht in das geport loch sey / vnd mach zu vnderst ein zenlein daran / vnd stof das rund holtz in das egemelt geport loch / also das dz zenlein in den ofnen schnit des aufrecht holtz hinab ge / vnd so oft du diß rund holtz vmb einen grad erhebest vnd stet wilt behalten / so oft scheub sein zenlein in ein kerblein / also magst du disen stab hoch oder nider ziehen / vnd oben an disen stab mach ein klein dünn geschicktes pretlein vnd por ein loch dardurch / auf das du darauß mit einem aug dest gewisser durch dz glas sehen mügest in der ram / was du dann dardurch sihest das verzeychen mit einem pensel auf einem glaser lot auf das glas / darnach zeychen das selb auf das ding darauf du malen wilt. Solichs ist gut all denen die nemand wöllen ab Conterfeten / vnd die irer sacht nit gewiß sind / so du dann der massen einen wild abmachen / so leyn im das haubt an / auf das er stet vnuerückt halt biß das du all notstrich tuest / so das geschehen ist dann magst du dich der farben gebrauchen / aber du must ein stet liecht suchen.

Item so du dem obgemelten pret darauf das glas gemacht ist vnden zwo zwerch leyten an nagelst / vnd zwen löcher in yetliche porst / vnd dann den gedrehten stab darein steckest / die vnden eyssen stet haben / dz alles recht in ein ander verfüget / magst du dich als eines tisch zu disem ding fügliche gebrauchen / diß alles mag zerlegt werden / auf das es leychtlich zu tragen vñ mit zühandelen sey. Solichs hab ich hernach auf gerissen.

2 ij